

Defendì senza fadia ses titel

Lutga: Festa grischuna-glarunaisa

DA GION NUTEGN STGIER / ANR

■ **Sco gia avant in onn a Flem gudogna Armon Orlik er a S-chanf l'occurrenza da lutga grischuna-glarunaisa 2017. Bunamain tschintg minutas ha cuzzà la lutga finala cunter Roger Rychen.** En l'Engiadin'Ota aveva la davosa Festa da lutga grischuna-glarunaisa gi lieu il 2009 a Silvaplana. Gudagnà quella aveva da lez temp *Arnold Forrer*, il lutgader dal chantun Son Gagl. Uss, otg onns pli tard, ha la «Societad da luotta Engiadina» organisà l'occurrenza da lutga e lieu d'acziun è stà l'areal da militar a S-chanf. Grazia a la lavur seriusa dals 100 voluntaris e dal comité d'organisaziun, cun *Andrea Gilli* al timun, è la festa d'aventada ina vaira aventura da sport sonda a S-chanf. Dal reminent ha quella vischnanca organisà per l'emprima giada ina uschè gronda festa da lutga.

Radund 2000 aspectaturs

Chattà la via a S-chanf han radund 2000 personas che han lura persequità cun interess tut quai ch'è succedì en il resgim. Ina gronda part da quellas è vegnida en l'Engiadin'Ota cun il tren ed uschia nizzegià l'offerta speziala da la Viafier retica «simpl per retour». Il premi principal, il taur «Nero», sponsorisà da la vischnanca da S-chanf e cun ina valur da vers 5000 francs, deriva da l'uigl da la famiglia purila *Luigi* e *Paul Gmür* da Ramosch.



Armon Orlik, il victur da la Festa da lutga grischuna-glarunaisa, cun il premi principal, il taur «Nero».

KEYSTONE

140 lutgaders

Tiers avoir lieu la davosa fin d'emna anc ulteriuras festas da lutga, tranter auter l'appenzellaisa a Teufen e quella da la Svizra centrala ad Alpnach, èn stads da la partida a S-chanf 140 lutgaders da sis chan-

tuns da la Svizra orientala. Betg preschent era tranter auter *Samuel Giger*, il victur da la Festa da lutga dal nordost a Tavau, cun sa participar il lutgader dal chantun Turgovia ier a l'occurrenza da lutga a Teufen. Dal Grischun dentant era da la partida

sper *Armon Orlik*, il top-lutgader, l'entira paletta dals fermis lutgaders.

Strusch in auter che Orlik sco favorit

Suenter che Armon Orlik è pli u main guarì da sia blessura è el ì en il resgim a

S-chanf sco grond favorit per gudagnar suenter l'onn passà a Flem danovamain la Festa da lutga grischuna-glarunaisa. Entschet ha il lutgader da Maiavilla l'occurrenza be cun in pari cunter il Turitgais *Fabian Kindlimann*. Fin tar la lutga finala ha lura Orlik gudagnà ils proxims quatter cumbats, sche er be dus da quels cun la nota maximala da 10 puncts. Gudagnà cler ha el cunter *Pius Näfe* e *Marco Nägeli*, per cunter en la lutga cunter *Lars Geisser* e *Roman Schnurenberger* ha el bain gudagnà, però be mintgamaì cun ina nota da 9,75 puncts.

El aveva da gudagnar la lutga finala

Suenter tschintg lutgas era a la tesa da la rangaziun intermediara *Roger Rychen* e quai cun in total da 48,75 puncts. Orlik, quel aveva sin ses feigl da notas fin lura 48,25 puncts. Per defender ses titel era ina victoria dad el en la lutga finala cunter *Rychen* necessaria. A quel avess tanschì cunter Orlik in pari per daventar retg-lutgader da la festa grischuna-glarunaisa 2017. En la lutga finala è lura il Grischun stà pli activ, mussà meglras acziuns, per in pau pli ferm e movibel e mess il Glarunais suenter stgars tschintg minutas en il resgim. Sper Orlik han anc ils ulteriurs lutgaders grischuns fatg il cranz: *Sandro Schlegel*, *Fideris*, *Sandro Sprecher*, *Panaduz*, *Marc Jörger*, *Domat*, *Ursin Battaglia*, *Almens*, *Michael Fontana*, *Cuirà*, *Mike Peng*, *Malix*, *Roman Hochholdinger*, *Favugn* e *Christian Biäsch*, Tavau.